

Gonj Gangbit Gaeuq Ndeu



□ Loz Ginhhungz / 罗金宏

Gou miz gonj gangbit gaeuq ndeu, bakbit myaex lo, dungxbit hix doxnem lo. Yawj hwnjdaeu gonj bit neix wngdang baenz nyapnyaj vut bae lo, hoeng gou cix yawj de dijbauj lai yo hwnjdaeu, cuengq youq aen gvihsaw giz ronghrigrig, seiz mbouj seiz yawjyawj de, nanz mbouj nanz uetuet de, unqswnh lumhlumh de…… De mboujdanb buenx gou gvaq seiz doegsaw haemzhoj, lij miz aen cingzgeih naeknetnet ndeu.

Seiz gou ngamq doeg cuhcungh, daegbied maqmuengh miz gonj gangbit ndeu. Aenvih seizde ndawranz gungzhoj lai, mizseiz gij ngaenz cawx gyu cawx haj cungj mbouj miz, ndigah aen simnyienh neix cungj mbouj gamj dwen hawj bohmei nyi, cij laeglemx gangj hawj daxbuz rox.

Daxbuz dingq le, sim’ in rubrub gyaeu gou naeuz: “Lan gvai gou ha, aen simnyienh mwngz daxbuz bang mwngz, hoeng mwngz aeu roengzrengz doegsaw bw!” Gou ngaekgyaeu ded-ded dapwngq daxbuz. Caen dwg nanzvei daxbuz lo, daxbuz ngoenz-naengz bae ndoi ciengx 5 duz vaiz, lij guh gij hongranz dajcawj dem, de miz maz banhfap rom ngaenz hawj gou cawx gangbit ne?

Gonj bit gou siengj cawx haenx, gai 1.66 maenz, seizneix yawj hwnjdaeu cienh raixcaix, hoeng seizhaenx gij ngaenz neix ndaej cawx 2 gaen lai nohmou lo. Ngeix daengz couh yaek miz gonj bit habsim lo, lumj ndaej gwn oij nei daj ndawsim roxnyinh vandsedsed. Hoeng, aen singhgiz ndeu gvaqbae lo, song aen singhgiz gvaqbae lo…… Lij caengz raen daxbuz dwen gienh saeh neix, gou hix mbouj gamj cam de.

Da raen aen singhgiz daihsam yaek gvaqbae lo, ngoenz singhgizroek banhaemh, daxbuz heuh gou daengz henz ndang de, youq ndaw daeh mbon ok daeb ngaenz ndeu, naj riunyumnyum sing daemq naeuz: “Ne, lan gvai, daxbuz rom ndaej ngaenz hawj mwngz cawx gonjbit lo, gij ngaenz lw roengzdaeu mwngz couh gag dawz, aeu mbaet gwn mbaet yungh bw!” Fwngz

gaem daeb ngaenz raeujremrem neix, gou gikdoengh ndaej raemxda gvaengz youq ndaw da, aen gyaeu moek haeu ndaw rungj daxbuz bae, lien sing gangj: “Gyo’mbaiq daxbuz, gyo’mbaiq daxbuz!”

Daxbuz ndang iqet, yaek ndaej 70 bi lo, hoeng guhhong hwnjdaeu miz di hauxseng hix mbouj beij de bw. Vihliux rom ngaenz hawj gou cawx gonj gangbit, daxbuz ngoenznaengz youq duzvaiz rouh boengz seiz, bae ndaw ndoeng ra mbaet ywdoj gai hawj boux canghyw ndaw mbanj, laebdaeb sai le 20 ngoenz! Daeb ngaenz na-nedned, miz mbaw song gak、5 gak…… gungh 2.2 maenz, gij ngaenz neix ndaej daeu caen mbouj yungzheih ha! Daxbuz nyienh sinhoj baenzlai ra ngaen hawj gou bae cawx gangbit, hix mbouj sij ndaej bae cawx

geij gaen noh dauqdaeu gwn, seizneix gou baez ngeix daengz neix cungj gig sim’in.

Doeklaeng, gou ngoenznaengz fwngz gaem gonj gangbit de sij saw hagsib, cungj roxnyinh miz doiq lwgda ndeu youq gizgyawj cimyawj gou, ndawde miz gij maqmuengh naeknet daxbuz, hawj gou engqgya roengzrengz bae doegsaw. Seizde miz di doengzhag ciengz deuz hag bae ra gijgwn bae guhcaemz, yienznaeuz gou mizseiz hix siengj yienghneix guh, hoeng baez yawjraen gonj gangbit neix, gou couh lauxsaed lo. Gou gag nai swheij, caiq haemz caiq hoj hix aeu haeb heuj doegsaw, mboujne couh doiq mbouj hwnj daxbuz.

Gonj gangbit neix buenx gou gvaq cuhcungh le, hix miznaj duiyouh lo, yienznaeuz bakbik myaex caemh–

caiq dungxbit doxnem lo, hoeng gou lij sij mbouj ndaej vut bae. Cunghconh bizyez le, gou yo de youq ndaw gvihsaw, nanz mbouj nanz dawz okdaeu yawjyawj. Aenvih de hawj gou maqmuengh caeuq ligliengh, mbouj lau gungzhoj, engq youqgaen dwg lij miz gij ndiepgyaez daxbuz youq ndawde.

Seizneix, yienznaeuz daxbuz gvaqbae geijcib bi lo, hoeng aen yienghceij de ciengzseiz youq ndaw ukgyaeu gou, yien ndaej gig hungmbwk、gig unqswnh. Gonj gangbit yienznaeuz youh gaeuq youh vaih lo, hoeng de youq ndawsim gou youh gyaeu youh ndei.

Seiq Cung Cienzhohi Dwg Rumzcine

□ Cinz Genmouz / 覃建谋

Cibgouj gaiq seiq cung,
Lumj rumzcine,
Daj Baekging ci daeu,
Ci ndaej lajmbwn raeuz,
Gizgiz raeu,
Raemx beij laeuj lai van.

Rumzcine daengz ndaw bya,
Va doek laj,
Caiq hwnj nga giet aen,
Rumzcine ci daeu daengz,
Caenda raen,
Bouxhoj baenz bouxmiz.

Rumzcine daengz ndaw daemz,
Langh sam caengz,
Raemxgyaeng bienq raemxmbaq,
Gaijgwz hai conghdoh,
Baij baenz coz,
Yinx mboqgim riuz ma.

Rumzcine daengz lajmbanj,
Mbanj ndaw bya,
Ranzhaz bienq laeuz sang,
Lajmbanj bienq diendanz,

Lwgminz gangj,
Saedceij van gvaq oij.

Rumzcine daengz ndaw naz,
Haeux fat ngaz,
Ndae hai va miz faen,
Mbwn ndei yienghyiengh baenz,
Caen dahraix,
Aencang cungj raen rim.

Rumzcine daengz ndawranz,
Raeuz sim’ angq,
Mbouj daem yangz muh mba,
Yienghyiengh dengiva,
Doeng den gvaq,
Goeng riengz yah diuqfoux.

Rumzcine daengz gwnz daiz,
Ndei daiq lai,
Bienqbaenz ngaiz riengz noh,
Daengx ranz riuhohe,
Laux iq coz,
Gingq boi hoh siujgangh.

Rumzcine daengz daihloh,

Heiqei moq,
Rox byaij hix rox mbin,
Lwgminz miz ngaenzgim,
Angq ndawsim,
Bae Baekging lijyouz.

Rumzcine daengz ndaw haij,
Raeuz ruzhaij,
Hwnzngoenz byaij mbouj dingz,
Bauj beksingq anningz,
Vunz gwnzbiengz,
Cungj sing angq caez haenh.

Rumzcine doh cienz guek,
Raeuz Cungguek,
Cienzbouh duet gungzhoj,
14 ik lwgminz,
Doengz diuz sim,
Gvaq saedceij vuenyungz.

Rumzcine doh seiqgyaiq,
Loh daiq loh,
Saedcaih doq bienq ndei,
Gaicawx baedauq deih,
Lumj coemh feiz,
Beij gaxgonq hoenghhwd.

·Sawcuenhraz Lwgnyez·

Gij Golwgnyez Henz Dahhoengz

□ Lanz Haijyangz Moz Beibei / 蓝海洋 莫蓓蓓

Mbatneix, boux dahsau haenx deng Lungz Byauh yawj ndaej ngaemgyaeu roengzbae lo, diuz mengq raezrang baij youq henz ndang, song cik fwngz haunyo saeqnaeh youq ndaw raemxdah saeg geu buhraiz ndeu, faj naj gyaundeij cij ndaej yawjraen dingz ndeu. Hoeng, Lungz Byauh roxnyinh gig geizheih, de maj ndaej baenzneix hung, youq Mbanjgyaeujdah baihnaj baihlaeng, hix raen gvaq mbouj noix dahsau lo, coengzlaiz mbouj ndaej raen gvaq dahsau baenzneix gyaetnyaed ndeigyaez, gvaicq mbouj ndaej de cim doeksaet baenzneix, gingqyienz yawj ndaej nyengh ndaej ndwn youq gizde, yaepseiz lumz le bonjfaenh dauqdaeu youq gyawz.

Nyengh ndaej yaep ndeu, aicq boux dahsau haenx roxnyinh miz maz mbouj ngamj, youh ngiengxgyaeu hwnjdaeu, gij lwgda songde youh doxbungz moq. Song gemj dahsau baez nding, cingq yaek caiq ngaemgyaeu roengzbae, Lungz Byauh mbeihung coh de ngaekgyaeu riunyumj, habseiz cam coenz ndeu:

“Gizneix dwg gyawz?”

Dahsau daceangz de baez he, naj caem, dauq cam de coenz he:

“Mwngz yaek bae daengz gyawz bae?”

“Gou dwg vunz Mbanjgyaeujdah hane.”

“Byawz guenj mwngz dwg vunz Mbanjgyaeujdah roxnaeuz vunz Mbanjbyaidah?”

Dahsau ngaemgyaeu, doq nam

doq haenqrengz saeg buhvaq.

“Gou byaij loek lo, mbouj rox baenzlawz byaij dauqbae.” Lungz Byauh lwnh hawj dahsau dingq: “Gizneix dwg mbouj dwg Mbanjsaulengj?”

“Hihi!”

Dahsau riu hwnjdaeu lo, hoeng lij laebdaeb ngaemgyaeu gungj hwet saeg buhvaq.

(caengz sat)